

## HUTBA – AJETI O NEKOLIKO ZNAČAJNIH SVOJSTAVA VJERNIKA

Hvala Allahu, dž.š., salavat i selam Njegovom poslaniku Muhamedu, a.s

Draga braćo!

Danas se podsjećamo na nekoliko interesantnih ajeta iz Kur`ana, koji nabrajaju neka svojstva koja bi pravi vjernik trebao imati kod sebe.

U suri Er-Ra`ad, 19-24. ajet, Allah. dž.š., kaže:

**„Zar je onaj koji zna da je istina ono što ti se objavljuje od tvoga Gospodara kao onaj ko je slijep? Opomenu prihvataju samo razumni, koji ispunjavaju ono na što su se Bogu obavezali i ne krše dogovoreno, koji vezuju ono što je Bog naredio da se vezuje i boje se svoga Gospodara, te strahuju od lošeg obračuna, oni koji se strpe da bi stekli naklonost svoga Gospodara, koji namaz klanjaju, koji tajno i javno od onoga čime smo ih opskrbili udjeljuju, te koji dobrim loše potiskuju. Njima će konačni dom pripasti Edenski vrtovi, u koje će ulaziti zajedno s onima koji su dobri iz kruga svojih predaka, supružnika i potomaka, dok će na sva vrata ulaziti kod njih meleki govoreći: „Spas i mir na vas, zato što ste strpljivi bili!“ Pa, divna li domaposljednjega!“**

Dakle, želimo li da nas u Džennetu meleki srdačno dočekaju, morali bi što češće razmišljati kako se odnosimo prema amanetu koji smo preuzeli.

Isto tako, stalno se trebamo preispitivati koliko držimo do obećanja koje dadnemo, bez obzira o kome se radilo.

Vjernik stalno mora razmišljati o Danu obračuna za djela koja je činio.

I u ovom kontekstu nezaobilazno je razmišljanje o saburu, kao i namazu, te sadaki, čime se Božija naklonost stiče.

Konačno, permanentno nastojanje da se učini što više dobra i time izbrišu i potisnu loša djela, kojih, nažalost, uvijek ima, pečat je ovih osobina.

Kao i u svemu, najbolji tumač kur`anskih ajeta je Muhamed, a.s., pa ovdje navodimo jedan poduži hadis:

**„Ko vjerniku otkloni jednu od dunjalučkih nevolja, Allah će od njega otkloniti jednu od nevolja Sudnjeg dana. Ko olakša onome ko je u teškoći, Allah će njemu olakšati na ovom i budućem svijetu. Allah pomaže robu koji je pomogao svom bratu. Ko se uputi putem da na njemu traži znanje, Allah će mu njime olakšati put u Džennet. Kad god se ljudi skupe u jednoj od Allahovih kuća radi učenja i proučavanja Njegove Knjige, na njih se spusti smiraj i prekrije ih milost, okruže ih meleki, a Allah ih spomene onima koji su kod Njega. Koga na tom putu spriječe njegova djela, neće mu biti od koristi njegovo porijeklo.“**

Ovu hutbu završavamo 32. ajetom sure Ez-Zuhruf:

**„Zar da oni vrše raspodjelu milosti tvoga Gospodara?! Mi vršimo među njima raspodjelu sredstava za život na ovome svijetu i uzdižemo jedne nad drugima po stupnjevima, pa onda oni jedni druge iskorištavaju, ali milost tvog Gospodara bolja je od onog što oni skupljaju.“**

Uzvišeni Gospodaru, daj nam da osjetimo Tvoju neizmjernu milost.

Amin!

Idriz-ef. Karaman, Malmö, 26. oktobar 2018.